

# Filipai thofroh gontwat

## Porr dwandfakhato htafmot

### Barkof kfo nuhas mrokfom

Porr wandfamort ndar gontwat. Ror Yuropko yihato Bro Nkifrarhu hingrneft kasinyamo barkof kmit. Filipait Masedonia Profins korht. Porr nd kmi Filipait Bro Nkifrarhu hingrneft kasinya tanyhato wom kmit tfit yimor. Wom kmit yi hingrna hasetrn fakmomr. Yakhato kalabus htafmomr. Kalabus tohhato wanyakmor Filipaithu Kristenm wom yimam yihato tfit wom yima yuhum hemotmm nd rom wanyuk mrokfom mfahtonimomm. Nd mrokfom ror wanyakmohat nhai krhohato rorhu krho yima yuhurhu mrokfom tfit ndar gontwat htarmorm. Nhai. Ror Jisasr yakitoh kihhato tohmor. Ndnetrn ror be yindhör yima yuhurpno tohmor.

Porr Bro Nkifrarhu hingrneft tohhato marufen duhatr rhumohat, Filipaithu Kristenmn marufam hta nhafohhato htafhemomr. Ndnetrn Porrhu kfo yindhör mrokfot ndar gontwatn htafmort. Yo womt kalabus tohetrn duka memor, “Na kalabus tohwa mrokfot Filipai thofm wanyakruhamn bok dukefm yakruhamn yima yuhum krhorahmm.” Ndnetrn wom kfo bmta mrokfom gontwatn htafmorm.

Porr kfo memorm, “Nd niko Jisasr pno yakmo nfri toh nmbuhati nfri yima dukefr, nhai Judaroh nkifra boririfhut hikhato yakrmokomr. Nhai. Jisasr hikhato fakmokomr.” Memorm, “Jisasr tohmo toheft tohhikfot. Jisasr nhai marimor, ‘Na bro yimaya,’ yo nhai turhu dukefr hikrmor. Nhai. Ror be hifa yima yuhurn Bro Nkifrar hayuk hingrnefrpat fakitohmor.” Kfo memorm, “Yimam Kraistrpno brbo frtkafwam, rroh yima yuhum miyorhwamm yindhör rihfurparpno korhrm.”

Ndar gontwathu mrokfom hti thombat, htirahn Porr be tu marbitn htafmorm Filipaithu Kristenm.

---

### **Porrhu tamoh tamoh nefm Filipai thofm hti dukamoumr. Ndnatn Porr bro yindhör rihfurpno tohmor.**

*(Sapta 1–4)*

**1** <sup>1</sup>No Por Timotirono Jisas Kraistrhu hingrneft hingrnewa yimayeno. No niko Filipaithu yimako dukewunonko. Ndnatn na Pora wandfiwant ndar gontwat. Niko Filipaithu yimako, Kraistr Jisasr hikwako

yo niko pastoko yo niko Krairhu hingerneft hingeranuhiwa yimako, nikmoh yufampno ndar gontwat htefiwant. <sup>2</sup>Nmoh Bro Yifemrkoni nmoh Nungothet Jisas Krair nikmoh toh nmbuham atoh natwihkahfko ayak marnyatwafko.

### **Porr Bro Nkifrar kfo yindhormo yuhat**

<sup>3</sup>Yiha yiha na nikmoh dukefr yak thoft, Bro Nkifrar kfo yindhorwanr. <sup>4-5</sup>Na nikompno barkof mtohakni-hato gutnius mrokfot Filipait pthakni-mohat, hifa nikomn nd mrokfot bi yakhato, tfit nikompno rpat nd gutnius hingerneft hingeranuhaknimokma. Rihingrnakmohat to be toko yuhre hingernanho hanitkma. Ndnatn nanhu yima yuhur yindhhorwor niko yutahato kfo bruttna yindhorneft. <sup>6</sup>Nanhu htiyefit inji htitant, Bro Nkifrar bi nikompno bi inji ndttet dborioh hingerneft rihingrnakmohat, to be nikompno hingernehany hingernehany Krair nierahr. <sup>7</sup>Niko nanhu hingerneft tamnouwa yimayeko. To na ndttet yimena Bro Nkifrar yuhuwafhato dhemo hingerneft hifa nikomn kakitoh-nhohnewukma. Na kalabus tohneft o kalabus toh duha yimam kangm gutnius ayak thunomt o finji ananomt hifa nikompno rpat tohhato gutnius yonm kanjo kakitohwonomt. Nhai yimam gutnius mrokfot finjinakfot. <sup>8</sup>Bro Nkifrar nanhu yima yuhur htitworr. Na tu kfo mif mifwanko, nanhu yima yuhur niko dukewur nikmoh yi htineft. Krair Jisasr niko duka yuhuwafmo kanjo inji dukiwanko.

<sup>9</sup>Na niko yutahato kfo bruttna thombat, nikmoh yima nayak nanyimaneft, o yima nayak marnyaneft yo tuko nahti duka nahti dukaneft, nd neft kanga mfro mfro yakitohaknikah-komn, Bro Nkifrar dukewa dukef yuham hti duka tungunarahakomn yo hti duka tungunarahkomm fasoh nefmi dborioh nefm. Ndm kfo bruttne-wanko. <sup>10</sup>Fasoh nefm hti nhta mirahko ndm fasoh nefem. Dborioh nefm inji buga, hti nhtarahkomm. Hti nhtarahakomn, nikmoh toh nmbuham be hifa toh marnyarahko. Nhai wom fasoh nefm wom yimam yak nuhasruhatkomm. Be hifa dborioh toh nmbuhatn toh hasetkomn Krair yawihnerahr. <sup>11</sup>Nd Jisas Krair yak nuhasyuk dborioh nefrpam womm yak nuhasruhatkomm womm nikmoh dborioh nefm htiruhamn Bro Nkifrar kfo yindhorrhahr.

### **Porr kalabus tohmotr Krairhu mrokfot bromot**

<sup>12</sup>Niko nanpno hingernewa brata-kfot kanga, akfo dukayanko. Mirahko ka bi kalabus tohwarn gutniuskfot ka nhai wom yiruhatt. Nhai. Kfiwanko nd tkittn gutnius tfit hingerneft mburaknitatn hingerneft mfro mfro yiyaknitt. <sup>13</sup>Nd asharhof yimam yo kingrhu kuny kmifat tohukatohwa yimam na kalabus htamo nmbuhat htihato kfo memom, “Na Krairhu gutniuskfot kfiwota yakhato kalabus htamoma.” <sup>14</sup>Bok yimam asha Krair hikwam na Bro Nkifrar tohukatohmo nmbuhat htihato rom bi

Kraisrpar rroh bro dukefm htefum. Nhai wom yakrme yima yuhumpno rhukahmm. Kraisrhu mrokfot ptha habri thombat, nhai yakrme hanyhato pthakahmt bro rifiny skitm. Nhai. Rifiny skitm tohhato pthiwumt.

<sup>15-17</sup>Kfo ptha htfas thombat womrpam kfo yuhuweh htfaswom. Kangm, “Tamohmpno Porrpar Bro Nkifrar yak marnyewatr kmi kmi rorhu yufarpat kfo yindhorwam? Nom to inji kangnom Bro Nkifrar ayak marnyakahtnom nmoh yufam kmi kmi akfo yindhor habrimnom.” Rom ptha yuhuweh htfas thoft, rroh dukefm duka kangm, “Inji akfo htfaskahtnom, na Pora wanyakrhoyann yima yuhur krhorahra.” Be yuwi kangm, “Wom nfri krhopam ahtanomr.” Ndnetmn inji newum. Womm nd hifa yima yuhetm rroh dukefm duka kangm, “Tamohmpno Porr kfo yuhuweh htfasruhanomr? Nom be gutniuskfot akfo htfaskahtnom kmi kmi nd gutniuskforpat broniraht. Ror be Bro Nkifrarhu hingrnefthu htiafohany yuker. Nd hingrneftn Bro Nkifrar fak htamorr. Kraisr hik duha yimam mirahm, ‘Akfo dburna inji ananomt tfit rorn tohhato kfo nuhas hik marnyarahm.’ ” <sup>18</sup>Na nd kfo yuhuweh htfaswa yimam na nhai kfo mekfot, “Tamohmpno inji kfo yuhuwewama?” Na nhai inji kfokfot. Nd kfo yuhuwehet yimami nd hifa yima yuhet yimam rom bugam na yindhorwanm Kraisrhu mrokfot romn kfo ptha htfaswatmt.

#### **Porr kangr atohkahann Filipai thofm kfo bmtaruhanm**

<sup>19</sup>Nanhu yima yuhur duka kangr, niko Filipaithu Kraisr hiket yimako kfo bruttniwotkma Jisas Kraisrhu Yafothat toh natwihwota. Rot kforaht na fnahniruha. <sup>20</sup>Toh bmtarhoyann ptha thombat, nhai bso yewirnano yimtnahato ptharhota. Ptha brorhotann mrokfom wanyrahmm. Na yima nfriya tohan o fnohniya dborah nefm na nayukm yimam htiruhamn Kraisr kfo yindhorrahmr. <sup>21</sup>Nanhu htieft inji htitant, yima nfriya afo ftoha nhai mrokfom. Kraisrhu hingrneft tohhato hingrnaruhant. Fnokane ndt to hifa mrokfo duhatet. Nd tkittn Kraisrpono yi tohruha. <sup>22-23</sup>Afo yima nfriya ftohane, be Kraisrhu mrokfot kmi kmi kfo ptha fnahruhant. Nd hus yima yuhuf korhwofa. Bro yima yuhur duka kangr, hifa anohkahann be Kraisrpono amtoha. <sup>24</sup>Tfit wom yima yuhur nikom mdukekwoyann kanga afo atohkahann Kraisrhu mrokfom kfo bmtaruhanko. <sup>25</sup>Nanhu yima yuhur inji htitanr nikomn afo mdukak hanita, kanga afo niko Jisasrhu mrokfom afo wayakitoh bmtakomm, nd dukeftpno afo tohhato nikompno niahato Kraisrhu mrokfot kfo ptha bmtarhotanko Jisasrhu mrokfot yakitoh bmtaruhakomn yima yuhum yindhorrahmk. <sup>26</sup>Na afo yima nfriya ftohann nieya nikmoh kmit, be nhaf Krai Jisasr masat kfo yindhor mirahko, “O hifa Kraise toh rafomotnr, nhai yimam wasrmomr. Asor yima nfrir tohwarn nia kau hafotwornom.” Inji kfo yindhorrahko.

#### **Porr yakyuk krhopam kanjo Filipai thofm yak hnerahm**

<sup>27</sup>Bro mrokfot kfiwanko. Nikom tohyuk toh nmbuham, be Kraisrhu mrokfot kfiwa yuharpat toh hikkfot. Na be tukann yima nfriya afo

ftohane, ee btn tuka nia htiruhanko. Nhai asha afo kalabusn ftoha, kanga nikmoh toh nmbuhathu mrokfot awanyaktwoya amitwam, “Filipaithu Kristenm, nhai rinatuhtakahm. Rpatn rpa yima yuhurparn tohwamn Kraistrhu mrokfot kukatohaf hanitmt. Yimam kangm faso ahanyinomt o kfo dburnanomt, romn tfit kfo hik bohik marnyewumt. Inji newatm Kraistrhu mrokfot buriwut.” Na kanga inji awanyaktwoya. <sup>28</sup> Yo tu bro nmbuhat na kanga awanyaktwoya amitwam, “Nhai yakrmikahm Kraistrhu mrokfom yak dburnayuk yimampno nna kfo hamuh nna kfo hamuh thoft. Tum Kristenm rpatn natoh dbkafwamn Kraistrhu mrokfot kfo hta bohta marnyewumt.” Na kfiwanko, inji rpat tohhato Kraistrhu mrokfot yakitohhato ptharahkomt, be nd nikompno nia pthayuk yimam mhti yanhorahmko. Mhti yanhohato kfo mirahm, “Nom injina injinanest, Bro Nkifrar nom yak batiruharn, Filipai thofmn yakmiyak-rahr.” <sup>29</sup> Ndnatn nikmoh toh nmbuham be rpat tohhato rpa yima yuhurpar yakitohkfot. Bro Nkifrar hifa nikomn hti dukahato Kraistrhu hingerneft wafak htamorko. To mirahko ka be rorhu mrokfothu hiknefrpat hikkfot nhai, krhopam rpat yakkfot. <sup>30</sup> Niko htimoko na Filipait tohhato yakmo krho nmbuham, yo tfit arihat na asha Romt tohhato yekwa krho nmbuham wanyekwoko. Niko krhopam yakneft mirahko ka nndo. Nikomi na rpa yihotar kauwonom. Na yakyuk krho-pam niko to kekwomko.

### Rpa yima yuhur yakitohhato rpat tohkfot

**2** <sup>1</sup> Rpa yima yuhur yakitohhato rpat tohneft kfiwanko. Kraistr thu bmtiwatrko niko rorhu mrokfeft hikwohat o krhopam yekwohat, toh bmtewuko. Yo rorhu mondt htewatrko nikmoh yima yuhum miyorhwomko. Yo nikmoh yafothami Bro Nkifrarhu yafothat rpat nabnothato rpat tohwom. Yo nikmoh wom yimatm hifa yak marnyahato hti yuhuwafofwokomm. <sup>2</sup> Tmift rpa yima yuhurparhu toh nmbuharpas kanga rpa yima yuhurpar tohhato tuko niyak marnya niyak marnyakahtko na htihato nanhu yima yuhur yindhorrahr. <sup>3</sup> Rhu nmbuham mirahko be turpakmoh rhu nmbuha-rpam o yau nmbuharpam htihato ayak marnya bomarnyanom. Nhai. Womroh rhu yau beb nmbuham hti dukakfot. Womm finji rhu bebwom, afo romn yak marnya bomarnyafo, ee, kto tukmoh rhu nmbuham yak marnya-kfot. Mirahko be turpako yak marnya bomarnyahato womm ahti yindhorm-nom. Nhai. <sup>4</sup> Yo mirahko turpakmoh shrkam ahti dukanom. Womm tamoh shrketem rrohm afo yak marnyafhe-hato kto tukmohm.

### Kraistr yima furam kanjo toh hnamotr Bro Nkifrar tu bro yufat hemorr

<sup>5</sup> Niko Kraistr Jisarrhu yima yuhurhu dukefm kanjo inji dukahato tohkfot. <sup>6</sup> Ror inji tohmor. Ror yura hefenr Bro Nkifrarprno wutohmohat, rofhu toh ruhefm nhai nndoh nndoh. Nhai. Rofhu ruheft, toheft, yufat

rpat. Kto Kraistr nda bbinysoft yawihnamohat, nhai nd ruheft, toheft, yufat tfit dukarmort. Nhai. Monghemort. <sup>7</sup>Monghehato nda bbinysoft nia tohmohat, tfit hingrna yima furapa kanjo nia tohmo. <sup>8</sup>Be yima furam kanjo tohmo. Yimam htimoahat htimoumr yima furam kanjo. Ror nhai marimor, “Yindhorhato yufat yura yura htaruhant.” Nhai. Ror be yima furam kanjo tohhato nd Bro Nkifrar kfoyuk tng yuharpato toh hik hanymorn yura bgre misn kihgirmotmr nohmo. Tu bro yimtnayuk tkitt nohmo. <sup>9</sup>Nd nmbuhatpno Bro Nkifrar tu yura myorhekwa tu bro yufa brot hemorr. Nhai ror yakmo kanjohato yufat wom yimam yakitohkahm. <sup>10</sup>Nd bro yufat hemorr be bbinysoftu yimam, Maringour watohyukm, yo yura hefenr wutohyukm be rorhu yufat yutahato tabokmerahm. <sup>11</sup>Tabokmehato Bro Yifemr kfo yindhor mirahmr, Jisas Kraistr tu Broyer.

### **Bro Nkifrar duka yanho hanyhato hikkfot**

<sup>12</sup>Niko tu nanhu yimat mifkomn kfiwanko. Na nikmoha tohmohat, hifa htimoyanko Kraistr hifa hik marnya-mokomr. Be nd na htimo htiyefat kanjo wahiktwakomr. Mirahko be na htihato Kraistr ahiknomr. Ndt nhai hifat. Na wuri tohwa niko Kraistr hikkfot. Nikmoh fasoh nefm bi Bro Nkifrar fak thu hemorko. Ndnatn niko Bro Nkifrar hikneft duka yanho hanyhato hikkfot. <sup>13</sup>Bro Nkifrar thu yuhurhato kasinyewatrko tur hti yindhorwa nefm newukomm. Yo turn thu bmtaf hanitatrko nd nefm newukomm.

<sup>14</sup>Tamoh tamoh nefenm kangko ananomm, mirahko nna kfo baboba hanyhato ananomm. <sup>15</sup>Niko nda bbinysoft fasoh fasoh nefm nayet yimaroh buha tohwoko. Ndnatn be rpa yima yuhurparn ruhato tamoh tamoh nefenm nakfot. Nd rirhu arhuyuk yimam htihato mirahm, “Tu hifa dborioh nefm newum.” Nd niko tohwa tkitt nhai be dborioh yimarpam tohkahmt. Nhai. Fasoh yimam tom rpat tohwoko. Ndnatn nd niko nayuk dborioh nefmn nd kspita yauyuk yimam kshr kanjo yakitohhato yak nukak hanyrahkomm. <sup>16</sup>Yak nukak hanyruhatkomm hti dukarahmt tu tohyuk toheft. Niko inji narahko, be kto Kraistr yawihna thombat, kfo ptha yindhorrhanko. Kfo yindhor miruha, “Na Filipaipmpno tohhato hingrnato hingrneft nhai be hingrna furarmoyant. Nanhu hingrneft Filipait hingrnato yafothett rhumot.”

<sup>17</sup>Na fnohane, nhai mrofkfom. Niko Bro Nkifrar ofa yahuka kanjo nikmoh yima yuhum ofa kanjo hemokomr. Na washato prisroh wain ofa yak nengitwa kanjo nanhu kkut yohnineft, nhai mrofkfom. Na to yindhorwa. <sup>18</sup>Ndnettn niko rpat ayindhornom.

### **Timotir Filipaikorhof yi nmbuhat Porr kfo tkrurmo yuhat**

<sup>19</sup>Bi brbohwt Timotirhu nianeft. Nhai be bmbri nanhu fijo kfo tkrur-rhotanr. Bi tu Bro Nkifrar kangr, wakfo tkrurnr, ee btn kfo

tkrurafrhotanr myau hafot tanyrahrko. Rorn mhti tanyruharko tfit nia ptha nuhasrahra nikmoh toh nmbuham. <sup>20</sup>Nhai wom yimam na kanjo duka kfo pthakahmko. Nhai. Timotirpar na kanjo dukewurko. <sup>21</sup>Wom womt rom turoh rhu nmbuha-rpam hti dukewum. Krairshu tamoh tamoh dukefenm be inji dukani hanitmm. Nhai Krairshu dukefm rhukahmm. <sup>22</sup>Niko htimokomr Timotir, Bro Nkifrarhu hingerneft na hingerananhomoahat, yima nitohf kanjo inji hingernamouno Bro Nkifrarhu tamoh tamoh hingernefm rorn hingerana-nhomoura. <sup>23</sup>Ndnatn yimaroh kfo tkrurneft nhai wom yima furam kfo tkrurkfot. Tu Timotir kfo tkruraforuha. Afo nda Romt tohwa bro yimam kanga afo awany marnyayanme, finji finji kforhoma. Wany marnyahato ee btn kfo tkrurafrhotanr nierahr. <sup>24</sup>Na tukianhu nia nmbuhat nanhu bro dukeft duka kanga Bro Nkifrar be nhai wom kuknaruhatr nanhu kfo tkrurafneft. Be Timotirhu mongko hti yakrahkma.

#### **Epafrodaitusr Filipaikorhof yi nmbuhat Porr kfo tkrurmo yuhat**

<sup>25</sup>Epafrodaitusr, nanhu yimatr, ka tfit kmiko nierahr. Filipaithu yufathur ror asha nanpno nia tohmohat htimo-yanr Bro Nkifrarhu hingernefm rorn hifa fakitohno marnyamora. Na soldiam hingrniwa kanjo inji hingerana-nhomora. Tamoh krho nmbuham rorn titanhomoura. <sup>26</sup>Ror bro dbohneft yakmohat kmi thofko wanyakmokomt rorhu dbohneft. Ndnatn duka kangr, “Bmbri yirhoyann htirahma. Nhai bmbri yirfoya rom duka mirahm, ‘Ka bi fnohr.’ ” Ndnatn nierahr. <sup>27</sup>Nd rorhu dbohnefthu yak mrokfot niko wanymot, ndt nhai kfo fura mrokfot wanyrmoko. Dbohneft fak mifmotr. Bi noh nyingam fak hany sitamor. Bro Nkifrar ahti yuhuwap duha yirr bi nohngotrmor. Hifa Bro Nkifrar hti yuhuwapfahato fak kasinyamorr. Yo nhaf Bro Nkifrar nann wom dukeft mdukakmor. Duka memor, “Nd yimar nohrahr, tfit wom krhopam yakrah.” Nd dukefmpno nd ror yakmo dbohneft fak thumort. <sup>28</sup>Ndnatn nanhu bro dukefr duka kanga ayikaht tu Filipai thofm htiruhamrn rroh yima yuhum yindhorrahmm. Yo nd na duka krho hasiwa krho yima yuhur mirhurahra. <sup>29</sup>Epafrodaitusr asha niahato tohmohat, Bro Nkifrarhu hingerneftn niamor. Ndnatn tfit kmiko nia thoft wayindho-raktwakomr Krairshu yima yindhorwa kanjo. <sup>30</sup>Wadukako, Filipaithu yufathur ror niamorn, asharhof Krairshu hingerneft rorn nia hingerananhomora. Nd hingerneft tohhato bi noh hany sitamor. Ndnatn ndhtet hifa dborioh nefm nayet yimam bro yindhor nmbuhat htakfot.

#### **Kraisr hiket yimarhu yima yuhur wuthayerr**

**3** <sup>1</sup>Barenko, kanga wuroh mrokfom akfoyanko. Brorhu yindhor nmbuhat niko yakitohwat, mirahko ayafho thunomt, yakitohkfot. Bi ndwom gontwamn pthamoyanko. To tfitndar gontwatn tfit wompam

pthiwanko. Na nhai hhrekkaha nd rpahtet mrokforoh wawandfa thu wawandfa thu hatohneft. Na tuka kanga, “Akfo hatohkahtanm duka hanyrahmm mrokfom. Yimam mirahm, ‘Faso faso akfo htanomm,’ na nd kfo htayuk mrokfem mhtiyakruhamn toh bmtarahm. Nhai suhruhatm.”

<sup>2</sup>Bi nd na kfo hnamo mrokfom waduka hanyswakomm. Wom fasoh net yimar kangr, “Nikompon amruh-aknekahann fasoh fasoh akfo htayanko,” nd yimar sinya troh tanykfot. Wany yakitoh duha. Wany yakitohrahkomr be rorhu fasoh nefm yau kutetm kanjo nia yak truf wunarahrko rorhu kutt. Ndhtet yimam, tha pukneft kukatoh-wom, kfo nneh mirahmko, “Tha pukrahko Bro Nkifrarhu yonko rhurahko.” Inji kfo nneh bonhehrahmko.

<sup>3</sup>Ndhtet yimam nia pthiwumko mirahko awany yakitohnomm. Sinya troh tanykfot. Nhai tha puk thuneftpon Bro Nkifrarhu yonnom rhukahnom. Nhai. Nom tu Brorhu Yafothat thu kasinewattnom tu Bro Nkifrarhu lotu mifneft yak nuhaswattnom nom lotu-hato Krai Jisar kfo yindhorwonmr. Tot tu tha puk thuneftu yimbu yuha mift. <sup>4</sup>Be amekahmn Bro Nkifrar hti yindhorwor nkifrar boririfhut hiket yimam, na nhai wom yimar finji kforfotra. Na nd nkifra hingerneft yuhaf fak dbothat hikmoyant. <sup>5</sup>Barkoft akfoyanko, nanhu mmemt na hiyauni-mohat 7-pela marm rhunihato 8-yukr-pno nanhu that puk thumomt. Tot barkoft. Yo nanhu nia yuhaf nhaf inji. Na nasakmo yifammaf rof tu Isrerf. Tu Benjamin kuny shoff nasakmofa. Na tu Hibru mifa. Na nd Bro Nkifrarhu Farisiya tohmoyann nd rorhu boririfhut fak hik marnyamoyant. <sup>6</sup>Farisiya tohhato Bro Nkifrarhu hingerneft hingernehato rorhu yon kunys hikmoa nefm faso hti bebhato hik nembos tubatu inji namouanm. Womm tuha tat noh bonohmouanm. Be amekahmn, “Be nd boririfhut hikhato Bro Nkifrarhu yonn rhurahn,” na nhai wom tamohm dukarfota. <sup>7</sup>Nd na hik hnamo yihotar yo na nahnamo nefm memoa ka injinahato Bro Nkifrar hifa hti yindhorrahra, to nhai. Nd nefm be bi fahmoyanm. Bi tfit Krai nanhu dukemf htewa. <sup>8</sup>Memoa, “Ka na nahnayuk nefm ka Bro Nkifrar htiruharn dborioh rhu nmbuhaf hirahra.” Ndnetann nd nefm na hnamoyanm. Arihat bi nanhu Bro Nungothet Krai rpon rim tohnmoyann, nd na nahnamo nefm tfit faso hti bebwanm. Tfit Krai rhu nefm hti wofnwa. Nd na bingot nahnamo nefm bi htitwanm tu yafotha duha nefem. Kanga Krai rpar tfit ayakitoh tkafkahann <sup>9</sup>be rorpno arim frfnahni bugakahann rorpno arim tohniya. Ndnetann na nhai wofnkaha nd nkifra boririfhut hikhato Bro Nkifrar na hifa hti yindhorneft. Nhai. Na kanga Krai rhu mrokfot wany yakiohato hikneftn Bro Nkifrar htihato na dborioh yufat yakneft na wofnwa. <sup>10</sup>Nanhu dukemf kanga tu Krai rpon arim frfnahni bugakahann nd ror nohhato sinyamo yuhathu bbuka rifhur afo ahtiyar yo ror yakmo yahrt kanga ayakwonant. Nd yahrt tohhato kanga nd tkittn anoha, to nhai mrokfom. <sup>11</sup>Na kanga ror nohhato sinyamo kanjo na inji nohhato asinyaya.

**Porr makkfothu yakneft duka duka tonemor**

<sup>12</sup>Na Kraistr yakmohat, dborioh rhu nmbuhathu yakneft dukahato fakmora. To nd ror kfoyuk rhu nmbuhathu na tafito yakkahant. Nd rhu nmbuhathu yakneft dukahato na yuhre nhombra bonhombriwa. Ndnetann na nhai bi kfo mekfot na bi Kraistr kfoyuk rhu nmbuhathu bi yak bugahato be bi nd rhu nmbuhathu korhwa. Nhai. <sup>13</sup>To yinopenroko, rot nd Kraistr kfoyuk rhu nmbuhathu yakneftn, tafi afo yak-kahant. To nd na bingot tohmo toh nmbuhathu o namo nefroh yafho thuneft, ndm na bi fahomoyanm, na nhai tfit wom dukak hanykahanm na bingot tohmo tohefm o namo nefm. Bi tfit nyingako rhuyuk rhu nmbuhathu yak dukefr duka duka korhwa. Torpar nanhu bro yima yuhur. <sup>14</sup>Nd yima yuhur yorhwotra kanga yimam tone resishato be nd praiskfothu yak dukefrparn duka duka tonita kanjo kanga na inji Kraistrparhu dukefrpar duka duka atoh nnfakahann nd ror kfoyuk tkitt yakruhant. Kraistr na yakmohat to rorpno hefenr mtoh nkifranineftn fakmora. Tot nd tkitthu yak dukefr yorhwotra na toh nnfewa.

<sup>15</sup>Nd dukefr na kfiwar, be yima dukefetnom arhunom, to nd na kfiwa dukefrparn hikkfot. Womr wom nndoh yima yuhetr rhuneft, tu Bro Nkifrar yak nuhasrahrr. Yak nuhasruharr hti dukarahrt tu Jisas Kraistr dukewa dukefr. <sup>16</sup>To ror nd dborioh dukefr nom bi yakitohwar, yafhothu duha. Nd dukefr yakitoh kihkfot.

<sup>17</sup>Niko tukanhukomn kfiwanko. Na nikmoha tohmohat, nanhu toh nmbuhathu bi htimokomm. Be nd yuhathu niko toh hikkfot. Yo frohm nikmoha nanhu tohefm toh hikwom, rroh tohefm toh hikkfot. <sup>18</sup>Nhai be sfno inji kfokahanko. Nhai. Ndharrhof yimam bi hti hik bohikmoyanm wom yimaroh nefm fasohem. Jisas Kraistr bgre mis nohmo yuhathu nhai mhtiyak-hato duka mekahm, “Bi nmoh fasoh nefmpno yimar nohmo. Be tmifnom fasoh nefroh nanefm.” Nhai. Nhai inji mhtiyakkahm. Fasoh nefm kakitoh yakitoh hanitmm. Ndhtet yimam niwa nefm bi kfo nuhasmoyanko. Tfit wompam kanga rom niwa nefm akfoyanm bu nyingam kawihnewuma. <sup>19</sup>Ndhtet fasoh net yimaroh nefm nhai yima dukefmpno nakahmm tamoh tamoh nefm. Turoh thatipthu rhu nmbuharpathu dukefrparn buriwumm. Bro dukefm korhm thatiptn. Be ndar bbinysofthu tamoh tamohroh dukefrparoh dukefm korhm. Tamoh nefm nanefthai yimtna hanyhato nakahmm. Be yihato na fura bofurewumm. Ndhtet yimam kto Bro Nkifrar yakhato yak batirahrm. <sup>20</sup>Nom, nom yura moun thofenom. Be Jisas Kraistr miyaknefrpatn toh gari hasiwunom. <sup>21</sup>Nd yiha ror yawihne thombat ndar nom bbinysoft hatohwa tfkha bebt thu troh tanyhato rorhu bbukeft kforaht, tfit turhut kanjo yak nhombranihato muhrahnom. Bro bbukeftpno nieruharn nd tamoh tamohm bbinysoft rhuyukm rorhu yinhitn rhurahm.



**Porr Filipai thofm mrokfom hemo yuhat**

**4** <sup>1</sup>Niko na hingrnanhomoako, Bro Kraistr yakitoh kihkfot. Na asha toh thoft ka duka kangko mumiwurnom. Nhahi. Na masat dukiwanko. Na Filipait htamo mswirt memoya, “Ka be nhai sinyaruhatm yewurim.” Awi, yewurifanm tom dborhamom. Nikomeko nd yewurifanm. Na asha rhu haso thoft duka haso kanga aikahann ahti hafotanm.

<sup>2</sup>Nifn Yuodia Sintikerofn, nifn nd hus metfn afo wawanyfn. Nifn nhai be met furafn rhukahfn. Nifn tu Bro Nkifrarhu met husefn. Ndnettn nifn tufn metfn niyak marnyahato rpat toh marnyakfot. <sup>3</sup>Yo ni, nanpno brbo tohhato Bro Nkifrarhu hingrnefn rpat nanpno hingrnanhoyukn, ni nd hus metf hti yau hafothato rofhu rpat niyak marnya duha nmbuham yihato yak marnyahekfot. Na Filipait tohhato hingrnamo hingrnefn rofn yindarim kanjo fakitohnhomoufa. Klemenrom damiagt rompno inji rpat hingrna-mounom. Rom buga rroh yufam korhwom toh nkifraniyet yimaroh yufam yorhwa gonborngtn.

<sup>4</sup>Niko tohneft be yindhor yima yuhurpno tohkfot. Nhahi be sfno inji kfokahanko. Niko bi Bro Nungothetr fakmorko. Ndnettn wayindhortwako. Tfit kfiwanko, wayindhortwako.

<sup>5</sup>Be hifa yindhor yima yuhurpno tohkfot. Yimam nikmoh dborioh nefm htiruhamn brbo furyakna hnerahmko. Brorhu yawihneft bi brbohwt. Ror yawihna thoft yak nhtarahrn nmoh nefm. <sup>6</sup>Tamoh tamoh krho nmbuham korhmnom, mirahko be nd krho dukefmm aduka hasonom. Yudbat Bro Nkifrar nakukfot. Tamoh tamoh krho nmbuham, ndm pthanihat toft yurakn kfo yindhorkfot. <sup>7</sup>Nd na kfiwa yuhat hikrahko hifa yima yuhum yakruhakomn nikmoh yuhuwaf marbimio mirhu marnyarahmko. Bro Nkifrar ndhtet yima yuhum yimam hanyeft yima yuhum nhai wom krhokahmm. Yima yuhum be frjbtwa buganitamn tfit Jisas Kraistrpar kitm. Ndhtet yima yuhumpno yimam rhuneft womm htihat mduka nhita mirahm, “To ndhtet yima yuhume finji finji yakhato inji yorhwam?”

<sup>8</sup>Barenko, tfit wom wuroh mrokfot kfiwanko. Mirahko nandomrhu neft ayaknom. Nandomr tu masat thu nheheter. Niko rorhu nefm hik duha. Tu Brorhu nefrpam yakitohhato hikkfot. Wom met yindarim nd niko nayuk dborioh nefm hti yindhorhato rom yindhorrhahm. <sup>9</sup>Na nikmoha nikompno tohmohat, tamoh dborioh nefm bi fak nuhasmoyanko. Yaunefm, pthaneft, nd ndm bi hti hikmokomm. Be nd na yak nuhasmo toh yuhat hikkfot. Inji toh marnyarahko htirahko nd nom tita hatohwa krhopam yak thuwa Nkifrar brbo nia tohnhorahrko.

**Porr Filipaipmpno maruhat yakhato kfo yindhormo kfo yindhor mrokfot**

<sup>10</sup>Hifa tuko wanakfo dukakmokomn tfit marufenm dukamokma. Ndtppno na Bror kfo yindhorwanr. Nhahi be ariharpa dukakahkma. Nhahi.

Duka hnamoukma tmifm, maruha htafyuk yihotam mduka nhiyaktihato be nhai htafhermokma. <sup>11</sup>Na nhai be maruham yaknafhato inji kfokaha. Nhai. Nanhu toheft bi inji ritohakmoya. Na sfno wuska duha tohneft o wusketa rhuneft, na nhai mrokfom. Na tohkfot. <sup>12</sup>Na sfno wuska duha tohneft na nhai womm kanjo kfo nur hatohkfot wommpno. Na nhai ndhtet nefm. O bok wusketa rhuneft nhaf inji buga. Na nhai finji kfokfot. Tamoh yatinoht o yeshriyeta rhuneft, na nhai wom mrokfom. Nanhu rhuneft to be yon mumenm kanjo rhukfot. Nhai tng ptha inji nakfot. <sup>13</sup>Nanhu toheft Kraistr thu bmtewotra nd rorhu bbukeftpno na hifa tohwa. Na nhai tamoh tamohroh dukefm dukakfot.

<sup>14</sup>Na tamoh krho nmbuham rhuneft niko tukmoh hti yuhuwaf nmbuhatn maruham htafahukkma. <sup>15</sup>Niko tu Filipai thofko htimoko. Na nikmoha Masedonia profinsko barkof yihato Bro Nkifrarhu mrokfot hany pthahato tfit kto wom kmiko yimohat, niko tuko htimoko. Nhai wom kmithu Kristenm wom maruham yak nhafoh-hato nanhu yufatpno htafrmomm. Tu be nhai mif. Niko Filipai thofkmoh maruhenrpam na korhwa. <sup>16</sup>Na Tesalonaikat yi tohmohat nhaf inji. Nikmoh marufam htimoyanm. Dfik yiham maruhenm htafhemokma. <sup>17</sup>Na nd mrokfom inji kfiwohat to mirahko ka maruham yuhurhato yuwi inji kfo rhtitr. Nhai. Nhai nanhu hanyeft dukahato kfokaha. Nhai. Kanga yima hanyeft yakitohkahtkomt Bro Nkifrar inji htihato tawo thu brurhirahrko. <sup>18</sup>Ndar na wandfiwa mrokfot maruharoh kfo nuhas mrokfot kanga akfo nuhasanko. Nd niko htafmo maruham asom bi fakmoyanm.

Epafrodaitusrpno htafmo maruham asom bi hnahemotra fakmoyanm. Hifa na yindhorwa. Be tu bok maruham htafhemokma. Ndmppno bok yiham tohniruha. Be tu Bro Nkifrar yimam hifa mthet kahpam tarioh mthahato Bro Nkifrar mthatihato yindhorwa kanjo inji htitanm ndar niko htafmo maruham. Hifa. Na be tu masat yindhorwa. <sup>19</sup>Nanhu Nkifranko be tu mfro tamoh tamoht harhuwor. Ndnnettn niko, Kraistr Jisarspno rpat tohyukko, tamoh tamohm miyak kkopentahato naku ttiwonrahko hirahrko. <sup>20</sup>Bro Nkifrar nmoh Yifemer. Ndnnettn rorhu yufat nom yiha yiha yuta yindhorkfot.

### Kfo yindhor mrokfom

<sup>21</sup>Niko Kraistr Jisars hikwako, nani nanpno asha hingrnewam nikompno kfo yindhor mrokfom htefiwumm. Yo asha Romthu yimam Bro Nkifrar hikwam, rom to inji nhaf kfo yindhor mrokfom htefiwumm. <sup>22</sup>Yo asharhof bro yima Sisarhu kunys hingrniwa Bro Nkifrar hiket yimam nhaf nikompno kfo yindhor mrokfom htefiwumm.

<sup>23</sup>Bro Nkifrarhu yuhuwaf nmbuhatn nikmoh yafotham thu kasirahtm.